

# ÄCHTI HEUDE

Dä Ma da obe uf em Dach wo sech hie het verschanzt  
wüu er d Wahrheit nid ertreit  
luegt abe uf di Lüt u dä Dude mit em Megaphon  
wonim vori irgendöppis het gseit

di hei au z gfüeu är bring sech um  
aber är het iz ke Zit dene aus z erkläre  
är bastlet a sinere Kanone  
und testet no einisch d Atmosphäre

är macht d Chleider nass u leit Heum a  
e Pilotebrüeu und e rote Umhang  
är ladt di Kanone und zilet i Himu  
stigt när obe ine u zieht

der Hebu und flügt belgeitet vom ne Rägeboge-  
Schweif us aune Farbe  
über d Chöpf über d Stadt dürd Sunne  
dervo ine wunderschöne Abe

und är flügt winers träumt het  
über di Stadt wit use bis uf z Land füre Wäutfride  
verteilt e Botschaft - und viu wichtiger  
-si Körper über z Land

und us däm guet gnährte Bode wachse Bäum  
u di Bäum die ändere d Luft  
und trage di Frücht und Biene sure desume  
aglockt vo de süesse Düft

und es änderet d Lüt, si hei meh Lust  
und Luft und läbe sithär fridlech  
niemer weiss wär dä Ma isch gsi  
- ächti Heude schwige.

# SÄG KES WORT

I wache uf tief i mine Ougeringe  
mir isch ächt schlächt merki woni d Ouge finge  
u dä dräcks Spächt hackt i mi Chopf ine  
i hocke uf häb mi Chopf ine Topf ine

i bi nume chli um d Hüser mit paar Kumple  
aber füele mi aus wäri vo de Hüser gumpet  
i bi fasch verlumpet, has bis id Chuchi gschafft  
bruche Saft, oh mi Gring dä pumpet

jedes chline Grüesch woni ghöre  
fat imim Chopf in hert afa dröne  
u dä dumpf Klinguton vo däm tumme Klingufon  
tönt für mi wine huere Blasmusig

REF:

lug i würd di gärn so versta aber säg kes Wort  
"säg kes Wort!"  
mir chöi schono drüber rede aber hüt hani ächt ke bock  
"säg kes Wort!"

und si seit i bi z spät und si heig iz de gnue  
und i chume gar nid drus aber säge nüt derzue

mir rede stundelang und i mues mi mau frage was das bringt  
es isch kes Wunder mann i chas nüm ertrage und es stimmt  
du redsch geng gliiche Scheiss und i mas fasch nüm ghöre  
si di Trumpete vo Jericho, wo mi innerlech zerstöre

lug i würd di gärn so versta aber säg kes Wort  
"säg kes Wort!"  
mir chöi schono drüber rede aber hüt hani ächt ke bock  
"säg kes Wort!"

du redsch nume bläch und ig a fuck mi Chopf  
mir chöi scho no drüber rede aber bitte säg kes Wort  
"säg kes Wort!"

si seit i sig so stur und heig e dicke Schädu

und des duet mer huere weh i mim huere dicke Schädu  
und i würd öppis säge aber chume nid derzue  
i sehne mi nach Alaska

u mini Stimm tönt liecht beleit  
und ihri Stimm tönt liecht beleid-igt  
i würd mi gärn verzieh lueg iz bitte nid i Spiegu  
mann i gloube fasch ha geschter es bier gha.

REF:

lug i würd di gärn so versta aber säg kes Wort  
"säg kes Wort!"  
mir chöi schono drüber rede aber hüt hani ächt ke bock  
"säg kes Wort!"

du redsch nume bläch und ig a fuck mi Chopf  
mir chöi scho no drüber rede aber bitte säg kes Wort  
"säg kes Wort!"

mir rede stundelang und i mues mi mau frage was das bringt  
es isch kes Wunder mann i chas nüm ertrage und es stimmt  
du redsch geng gliiche Scheiss und i mas fasch nüm ghöre  
si di Trumpete vo Jericho, wo mi innerlech zerstöre

lug i würd di gärn so versta aber säg kes Wort  
"säg kes Wort!"  
mir chöi schono drüber rede aber hüt hani ächt ke bock  
"säg kes Wort!"

du redsch nume bläch und ig a fuck mi Chopf  
mir chöi scho no drüber rede aber bitte säg kes, bitte säg kes, bitte säg kes  
Wort.

# LATVIA

I ha Zit für au di Problem  
und aui wo denn  
uf Gott zeut hei

i ha zit für au di haub starche  
Gfüeu wo mache  
dassi nur haub schlafe

gross igrahmt  
chli enttüscht  
wirde gross über das  
chönne rede mit de Lüt

hoffe das Rouchzeiche dört  
wo so wit här tönt  
der Fride akündet

es schmöckt nach Liebi und früscher Luune  
nach Waud und e Tisch mit Blueme  
nach Heu vo der Sunne tröchnet  
nach gumpende Töchter, fröhlechs Glächter

nach wiude Beeri und däm glasklare Bächli  
ir Wise vou Dischtubueme nach füechter Ärde  
und glücklech wärde, nach wite Reise,  
und trochne Steine

nach em ne Widerseh - dört am See  
mit derä Sehnsucht won i so vermisst ha  
setzt di a Tisch da, Latvia

REF:

es wird Räge ha,  
es macht mi sowieso kaputt  
zeig mir der Mond, sing dir es Lied  
lig dir i Schoss und flüge furt

o, Latvia,  
z höche Gras schlat Wäue nur für di  
und bringt mi hei zur Truurwide, mia Patria  
mir stärke für dini Schönheit

u für dini schön gfärbte  
Farbe am Hang

mir stärke für d Luft ud Ärde  
für d Versuechig  
und di wunderschöne Ouge

wo süsch o nüt anders wäre  
aus e blaue Kreis  
uf ere wisse Chugle

das Gfüeu we du mi berüersch, und i di  
u dä chaut Bach zwüsch de Zäie  
und uf der Hut und o zwüsch de Lippe  
der Früelig breitet si Mantu us

u mis Härz cha heile  
i ha Zit für di  
und es Schwärt derbi  
dassi der Schmärz cha teile  
und ar Ärde gä was si vo mir verlangt  
i ha Zit für di

di Nacht wär haub so gwautig  
ohni Frage, Latvia

# LIEBER FANFARE AUS NIE

Ja, dass i der nie me ha gseit dass' mer guet geit,  
und du mir guet tuesch und, ja, dass i eifach bi gange,  
bi mir heisst das ciao, i vermiss di, lueg zue der,  
und sorry euch für d Erwartige, i hasse mi derfür,  
und ja, i bi no chli z jung gsi u ha ke Ahnig gha wi me sech trennt  
u mi dernäbe beno, und i ha viu z viu gseit woni nid hätt bruche z säge

aber weni när dervor sta,  
und genau das vor ha, Härz - rein - Vorsatz  
denn chöme di Zwiifu di abrund-tiefe Abgründ  
packt mi di Chlaue, ah winis hasse!

wüu we d Schuud einisch lang e ke Sunne me gseht  
wird si grösser u stercher aus d Wärter  
u we Fähler sech einisch mau igschlosse hei  
- verchräbse si mit de Täter

## FANFARE

und ja i weiss, das isch o ke Usred me,  
i ha d Chance uf aus gha  
i hätt di küsst ehrlech, würklech, gloub mer,  
has eifach nume fautsch gmacht  
und ja, i ha viu z lang nüt gseit,  
nüt dergliche - ta u ha glächlet  
sorry, dass me da nid ine gseht, es chönt öppis verbräche

aber gloub ja nid, ja nid, dassi aus nid bereue!  
s nid probiere z spüele i nächtelang chnöile  
am Bode u no tiefer cha sinke aus mini vougloffne Finke

aber gloub ja nid, ja nid, es sig eifach so eifach  
ig u mini schwarze Schäfli verbringe Nächst duss im Voumond u  
hüüle zäme mit de Wöuf, in vou-mol-dur

lug es tuet mer -  
weh weni nume gseh was nid passiert  
u verdammt ja i gibes ja zue i ha di gliebt  
o i wär so dervor gstange dir das cho zäge  
ig uf der Stäge und du im Zimmer am läse

aber vor dire Tür hets e Schlucht gha  
churz bevor i da bi gsi, es het si sech uf da  
u vilech wäri gsprunge, aber wäri när ir Luft  
de packe mi wider, de packe mi wider

di Chlaue di chaute - Finger mit Faute,  
friere u biege u zieh u mi haute mi fern  
vo däm wo zersch eso eifach erschint aber  
mir geit das nid ine wime cha auso bini wider furt

auso bini wider furt!

FANFARE

# WIE CHÖIT DIR NUME

Wi chöit der nume bhaupte di Guete z si  
dir wo Land vergwautiget  
wo Vöüker mordet

wi weit dir nume wüsse was Freiheit isch  
dir wo niemer heit,  
wo würklech Freiheit läbt

wi chöit dir nume gloube di beste z si  
wenn niemer z Land verlat  
wenn niemer d Wäut het gseh

u wi chöi MIR nume bhaupte nume DIR sit so  
we mir genau glich wi dir,  
nur mit em Finger zeige

u wi chöi mir so betroffe euchi Schicksau gseh  
mit em Chopf nicke,  
u när e Scheiss druf gä

aus wetti da di Wäut immer böser wärde  
und mir nid - ei Idee  
für ne Lösig hätte

## INSTRUMENTAL

wi chöit dir nur so ignoranti Tüüfle si  
euch säuber fiire  
füelet nech guet derbi

u wi chöi mir nume glichzeitig am fiire si  
u när der Chopf schüttle  
u säge dir sits gsi

aus wetti da di Wäut immer böser wärde  
- und mir hie nid d Idee für d Lösig hätte

aus wetti üsi Wäut immer böser wärde  
- und mir d Idee nid für ne Lösig hätte



## BI NID SO

I läbe ersch richtig weni di berchume  
i läbe nonid so, i bi so nume  
aber so chumi äbe nid um di desume  
wüu es dünkt mit um di füert ke Wäg desume

auso bruchi di - wi machis nume?  
i bruche en Chance woni nid berchume  
i würdi se bercho, würdi richtig läbe  
für das muesi mit dir zersch e Gschicht erläbe

aber die erläbi ersch we du mit mir würdsch rede  
u de müesti de no wüsse wasi dir wett säge  
u no vorhär müesti mi vo däm Tisch erhöbe  
und uf eTisch chlopfe - und am ne Tisch hocke

es müest ir Nöchi vo dir zerscht dä Tisch gä  
weni wüsst wo de bisch chönt i ne mitnä  
doch wohäre? i müest wüsse wo du ize bisch  
wüu cho sueche chan di nid - mit me Tisch

REF:

Es lied unger dim Baukom  
e Rose so ganz spontan  
di vorem ertrinke rette  
mi im Bett a paar ringe chette

a däm Tag wo du bisch gebore  
het der Himu e Stärn verlore  
e Roman vorläse uf der Schoss  
mit dir e Wau iz Meer ga stosse

I bi nid so  
angers aus di angre  
o ig loufe so dür d Stadt  
nume i ha nid verstange  
wieso iz das mit dir nid klappt

aber auso gani zugg u starre stundelang a d Wang  
wüu i bi sicher, was mir fäut, isch e Plan!

mini Traum - hei di scho für mi bestimme  
- dini Traum kenne mi no ni dasch dumm  
das würd ändere, würdsch du näbe mir lige  
und i bi da auso chas ja nid a mir lige!

versta nid wi de mi nid chasch im Oug ha  
wieso mache mer nid eifach es Troumpaar?  
wär mer zäme chieme mir när i der Annabelle  
berchiem Blueme di wär überau im Gang verteut

u de würdi sogar angeri Froue lehre kenne  
u müest dir nüm z haube Läbe nacherenne  
wüu angri würde ize scho mi Name kenne  
wüu i wär ja iz dä typ us der Annabelle

aber ja, irgendwie, es geit nid uf  
z Schicksau des wott u besteit o druf  
chume nid dran verbi di für mi z gwinne  
u s faut mer ächt schwär da di rächte Wort z finge

REF:

Es lied unger dim Baukom  
e Rose so ganz spontan  
di vorem ertrinke rette  
mi im Bett a paar ringe chette

a däm Tag wo du bisch gebore  
het der Himu e Stärn verlore  
e Roman vorläse uf der Schoss  
mit dir e Wau iz Meer ga stosse

I bi nid so  
angers aus di angre  
o ig loufe so dür d Stadt  
nume i ha nid verstange  
wieso iz das mit dir nid klappt

aber auso gani zrug u starre stundelang a d Wang  
wüu i bi sicher, was mir fäut, isch e Plan!

BRIDGE:

Uoo, i schlücke Helium u flüge mit em Heli um di  
flüstere dir iz Ohr

REF:

Es lied unger dim Baukom  
e Rose so ganz spontan  
di vorem ertrinke rette  
mi im Bett a paar ringe chette

a däm Tag wo du bisch gebore  
het der Himu e Stärn verlore  
e Roman vorläse uf der Schoss  
mit dir e Wau iz Meer ga stosse

I bi nid so  
angers aus di angre  
o ig loufe so dür d Stadt  
sone ganz normale Bürger  
dasch genau was zue der passt

mir het d Partnersuechi gseit mir sige vou der Perfect Mätsch  
wenn nume du, das ou, gläse hätsch

# EI SCHRITT MEH

I ha kei Mitleid me gfunge  
ke Säubstbefriedigung  
ke Igang und ke Uswäg  
aber vorauem ke Grund

i bi gester no normau gsi  
i bi hüt chrankhaft und gfährdet  
ab iz bini i de Akte  
u darf nümme aues wärde

mis Spiegubiud verfrömdet  
entfernt sech und wird eget  
macht mer Angst  
dass Kontroue mi enteignet

REF:

nur ei Schritt meh - i gheie i dä Bode  
nur ei Schluck z viu - i sinke uf e Grund  
ar Strass steit es Ching wo mer seit das i no aus cha ha  
wes nume am ne Zwäck entgäge chunnt  
solangs no am ne Zwäck entgäge chunnt

stopfe Löcher mit Bedütig  
die geit mer langsam us  
ud Mittagssunne bränntet  
es gseht würklech nid guet us

und i würd mir la häufe  
aber dir verstöht mi nid  
wie weit der ou, wie weiter  
so wit abe möt der nid

für euch isch schwarz nume dunku  
und meh gits nid z entdecke  
doch we me im Dunkle läbt de kennt me  
schwarz i aune Facette.

REF:

nur ei Schritt meh - i gheie i dä Bode  
nur ei Schluck z viu - i sinke uf e Grund  
ar Strass steit es Ching wo mer seit das i no aus cha ha  
wes nume am ne Zwäck entgäge chunnt

nur ei Schritt meh - i gheie i dä Bode  
nur ei Schluck z viu - i sinke uf e Grund  
ar Strass steit es Ching wo mer seit das i no aus cha ha  
wes nume am ne Zwäck entgäge chunnt  
solangs no am ne Zwäck entgäge chunnt

I ha ne interne fehler  
Mis härz vertreit mi seeu nid  
I bi Grundsätzlech fautsch boue  
Da häufe ou di Ideene nid

Mini fründe chöi nid häufe  
Die müsse au ga schaffe  
Mir si ir schwiz und nid in Südamerika  
Hie mues me erstens witermache

REF:

nur ei Schritt meh - i gheie i dä Bode  
nur ei Schluck z viu - i sinke uf e Grund  
ar Strass steit es Ching wo mer seit das i no aus cha ha  
wes nume am ne Zwäck entgäge chunnt  
solangs no am ne Zwäck entgäge chunnt

nur ei Schritt meh - i gheie i dä Bode  
nur ei Schluck z viu - i sinke uf e Grund  
ar Strass steit es Ching wo mer seit das i no aus cha ha  
wes nume am ne Zwäck entgäge chunnt  
solangs no am ne Zwäck entgäge chunnt

# 1984

Dir weit uptime Beats mit Texte wo nid störe  
i wott nume es Drum dä Takt woni da ghöre  
dä wott ine dä wott düre dä wott dür mini Mühli  
ey das füeli i la hie iz grad Gott i mini Höhli

- früecher hätti no viu meh i dä Beat da  
fett ufblase und irgend e Schisch glallt  
- hüt hani überleit was geit  
was woti säge weles Wort wotti säge

was - wott i säge was wo wott i säge  
wo wott i säge dassi das wo i da säge  
isch es Wort nid e Säge aber was würdisch entgägne  
weni dir würd säge dasi däm Wort gar nie begägned bi

- i bi ne ma mi bescheinder Freud  
mit konstanter Truur u mit teiltem Leid  
mir hiuft weder di Rat no di chemischi Freud  
und i ha früe glehrt läbe mit der Einsamkeit

- mängisch so läär aus hätti Kanada im Sau  
u när wider bedrängt aus wäri Panamakanau  
aber öppis das hiuft mer geng i jedem Fau  
gib mer irgend es Drum u när chli Igangssignau

dir choufet Glück ir Oase vom Vergnüege  
für mi ischs e Wüesti, für mi ischs e Wüesti  
dir säget o dir finget d Rache no süess  
ig finge si e Wüesti, für mi ischs e Wüesti

i freu mi aubes wines Ching weni afa  
rappe blöd desume ohni würtlech öppis azfa  
und i ha fasch aus haub gmacht,  
fasch nüt fautsch aber chum öppis fertig...

(aber das wo ig wett säge isch)

das wo mi bewegt het, sit em 1984  
isch so säute es Ereignis, sicher sicher nid im Fernseh  
aber jedesmau wenni mini Eier ha packt  
mi ha erhobe use bi - das het mi veränderet

das woni ha glehrt sit em Summer 84,  
isch offe dür di Wäut si - spontani Freud z ha  
derbi bini mau so - mau so  
u när mau so gsi - ha dänkt i wett mau so si  
maus so si - när so si

- di Wäut isch hert wi chunsch zu ihrem Honig?  
ha mit Aliens gredt, hei gseit, si wüsses o nid  
- us ihrer Sicht lueg mir chli zweni ufe  
gö nid use aber schleppe Züg wo mir nid bruche

früecher hei mer no id Stärne gluegt für di schöne wite Pünktli  
hüt luege mer i Biudschirm für schöni heui Pünktli  
na ja - o nid der Wisheits letschte Schluss aber  
i würd iz säge das Lied isch mau langsam u sicher chli düre u fertig bi düre u duss

# MACH FÄHLER

Hüt füeli i mi mau - wider wine Hung  
u dä füeut sech hüt - wider wine Wurm  
u dä Wurm lueg ufe - id Sunne  
u füeut sech plötzlech - besser aus je!

i ha hie e Chübu mit chli vou,  
e Luune mit chli Lust, e Uhr mit nüt los  
u trummle uf der Brust,  
bini de der einzig wo ma fiire?  
du chasch schaffe wed tod bisch!

blödi Frage schwümme i mim Glas desume  
und i cha die bau au nüm schlücke  
und i bi so bow wow jipiyo wine Hung  
gäge mi wird bau aus nüm nütze

u ey was wosch so fescht öpper angers si,  
dass ig scho ir Du-Form mit der rede  
es cha viu passiere wo nid chasch kaschiere  
u das mues me fiire - ja o das mues si

REF:

mach Fähler  
wär weiss scho meh aus du?  
wüu ohni Fähler  
da bischs nid du du du du du

fingsch z Läbe so hert  
de fingt z Läbe di weich  
i ha i mim Läbe zwöi mau e Ma küsst  
guet a zwöit cha mi chum erinnre -  
sch emu e haarigi Sach gsi, item

me mues Zit o mau la verstriche di Farb  
wird süsch o nime richtig troche  
mues das Biud o mau chli la würke  
o au dä Scheiss wo mir scho hei verbroche



lueg ders a, lueg ders a,  
hock da häre u lueg dir dä Schade mau a  
irgendeinisch bruchts Zit u Stouz  
uf dä Schade wos a dir het hingerla - si

dass si Fähler u die si geil,  
di heile nieme u di weidi zeichne  
wüu di weidi breiche a de weiche Steue  
e, Gschicht wo dä när chasch am Heidi zeige

REF:

mach Fähler  
wär weiss scho meh aus du?  
wüu ohni Fähler  
da bischs nid du du du du du

Und är schribt der e Liebesbrief  
aber macht di Grammatikfähler  
und iz säg mer im Ärnst würdsch du  
lieber gar kene aus e Fautsche wähle?

Und är singt der es Liebeslied  
aber äbe trifft är da di Tön nid ganz  
und es tönt nid ganz aber ghört zu ihm  
zum ne wäse - ghöre Fähler

was dir fäut, si Fähler  
kei Zit, zum müed si  
es Läbe, isch süsch  
nur schlafe, uf der Buez si

das muesch der, mau einisch  
uf der Zunge la verga  
am beschte dunger, im Chäuer  
am ne Summernamitag

ei Fähler meh und i fiire hie z Jubiläum 10 mau fautsch uf hundert  
- u mini 49 Versüech mit mine 50 Fründe si nid ganz hundert  
nid ganz hundert nid ganz bache aber scheisse guet im fiire  
und iz gang! i Juli! u tüüsch ti! u fiir ne!

REF

# ROSS

I bi hüt Morge uf me Ross ufgwacht  
e Drüegs-huet an und e Frosch us Wachs  
hinger mir het grad e Hütte brönnt  
i mir inn het mir der Schädu brummt

z Ross het nach Schnaps u nach Zigis gschmöckt  
dr Bach het mi gspieglet bi kau rasiert  
mi Arm vougstämplet mit Klubsignet  
ke Ahnig wo ig äch bi furt gsi geschter

ar Wuuche am Himu isch Wärbig ghanget  
u plötzlech vernimmt me ne Ängus-stimm  
e Stimm so nöch, me ghört jede Atemzug  
wo seit, nächste haut Schwarzeburg

vor mir steit ei riese Zuckerbärg  
hinger mir ei riese Ries  
und aus wi wenn das e so eifach wär  
verlangt är e Liebesbewies

REF:

i ha aues mis Gäud i ne Chue investiert  
di isch iz duss im Garte am grase  
i ha d Liebi a Nagu ghänkt  
u hinger der Schüür uss vergrabe

-i bi fertig und unkompliziert  
und loufe o kerä me nache  
doch i ha mis Härz guet konserviert  
es schwümmt im Zwätschgewasser

über mir hei scho di Geier dräit  
unger mir hei si e Schatte gworfe  
i ha mi nur no nach Flüssigkeit  
aber wit u breit e kes Wasserloch

plötzlech erschint sone Gstaut vor mir  
e Postur wine Flöte us Amsterdam  
aber sch när nume der Ueli gsi  
"Bueb du wirsch gli us em Land verbannt"

houu... het dä mir Idruck gmacht  
mit sim bestächende Mundgeruch  
i ha bis jetzt wine Bänggu gläbt  
u bruche hie dringend Totau Umbruch

wüu gester wo zu mir di Zouberfrou  
mit Lippe wo gseit hei chum küss mi doch  
i ha se sehnsüchtig agluegt  
u gseit, Ängu i würd, doch i ha....

REF:

i ha aues mis Gäud i ne Chue investiert  
di isch iz duss im Garte am grase  
i ha d Liebi a Nagu ghänkt  
u hinger der Schüür uss vergrave

-i bi fertig und unkompliziert  
und loufe o kerä me nache  
doch i ha mis Härz guet konserviert  
es schwümmt im Zwätschgewasser

INSTRUMENTAL

i ha aues mis Gäud i ne Chue investiert  
di isch iz duss im Garte am grase  
i ha d Liebi a Nagu ghänkt  
u hinger der Schüür uss vergrave

-i bi fertig und unkompliziert  
und loufe o kerä me nache  
doch i ha mis Härz guet konserviert  
es schwümmt im Zwätschgewasser

# AUSO

Zerrisse mis Huus - hacke iz Brätt  
hautet mi wäg - wink mit der Fahne  
bring mi i Knascht - verhouze di Wäng  
bring mi id Ärde - bring mi hie wäg

hack mer id Frässe - mit der Machete  
sprüztet mit Wasser - sprüztet mit Bluet  
sprüztet mit Fүү - giesset mit Lava  
bringet di Monster - bringet di Gfahre

kämpfe bis z letscht - ei letsche Hieb  
Panzer mit Füscht - aus i mi Lyb  
tusche mit tot - der Tod vo mim Körper  
gäg Freiheit vom Geischt - aus nume Fleisch

i schlücke di Chugle - i bhaut se i mir  
aues Gedänke - zum nie me vergässe  
schreie id Lääri - i lääri Verspräche  
verspriche Erfüuig -

#####  
erfüuendi Hoffnig,  
seelige Friede,  
ergiebigе Durst,  
göttlechi Lust

unerschöpflechi Freud  
iifernde Niid  
niidische Hass  
Angst, Leid, Chum ize gib mers!

i wott aus a mr gspüre  
i wott aus so aus so  
gnau wides äue vorgseh so brutau so  
fautsch so fuu aber vou u nid haub so

ah - so ticksch du auso

was wosch eigentlech vo mir  
du huere Läbe  
was steusch mer für Frage  
was chasch scho erwarte?

für di ischs es Wärschzüg  
iz ischs e Waffe  
verdammst Novämber, verdammte Novämber

i schlücke di Chugle - i bhaut se i mir  
aues Gedänke - zum nie me vergässe  
schreie id Lääri - i lääri Verspräche  
verspriche Erfüuig - erfüendi Hoffnig

lärmendi Bluethüng - i tüüre Hotels  
mit huere viu Cocci - u huere viu Jets  
verschwändig u Gier - spiu mit em Fүүr  
i spiu der es Lied - ...vo dinere Höu

auso, de mache mer des angers  
vilech hei mer üs ja o eifach nid verstange  
vilech wirds de morn, Monde wirds no gnue gä  
taschte nach sim Liecht wine Nachtcherzeblueme

u gwinne es paar Tropfe, di darfi nid verlüre  
mir bruche ihre Saft u da giuts verdammst weni z vergüde  
u de geits wider Fluss ab, ds ghört aus so derzue  
ghört auso derzue

hock zersch mau mit dir häre u red no mau mit dir  
du und dini Vorstellige, was weit der au vo dir?  
das ghört doch aus derzue, das si dini Zuetate  
när bruchts no dini Tate ude hesch scho würklech guet grate!

auso packi mini Sache, denn wenn i mi grad no troue  
u de fließt mer hurti z Tote Meer us de Ouge  
u de laht me das la fliesse, u zeigt sech mau betroffe  
wüu denn isch z Härz offe.

# LADRINA

Är schouklet i sim Stueu  
u brummt e Melodie  
är het e Sauzwasserstimm wo chli herb klingt

är büschelet si Bart  
fahrt sech dür sis Haar  
der Grau Star trüebt sini Ouge

e Briise bringt Luft vo däm Meer  
wo der aut sis Läbe het gschänkt  
sis Läbe het vermacht

und wär hätti dänkt das är am ändi vo Tage  
nid ma sis Auter bechlage sech no mau use wird wage

sit Wuche ischer dran  
macht si Kutter no mau flott  
sogar e Farbstrich heter uftreit

tribe vo der Zit  
vilech tribe vo der Angscht  
är verbringt sis Läbe i däm Dorf drin

är füeut sech so nid wou  
äue scho sit geng  
aber iz im Spätsummer  
ischs am schlimmste

är gspürt ne cho der Sturm  
de verspürter sone Drang  
u nimmt si Handorgle füre und de spiut er

...di Melodie  
...das aute Seefahrer Lied vo de Wäue

und är brummet so chli mit wen är se spiut  
u säglet richtig Horizont  
gnau dört wo d Sunne verschwindet  
sech gäge unger verbindet dört weiser dört  
- dört gani unger

schoukle macht ne ruhig  
sit si Kutter nümme fahrt  
uner d Wäue nümme täglech cha verfouge

är starrt konzentriert iz Meer  
aus gsäch er uf e Grund  
aus wär dört öppis wone nid in Rueh lat

niemer weis warum  
niemer kennt der Grund  
aber irgendöppis schmöckt er i der Meer Luft

är luegt use i das Blau  
erwartet öppis cho  
sit 25 Jahr isch är am warte

är dräit sech no mau um,  
einisch suüfzt er tief  
plötzlech gseht me hinger ihm nid mau es Dorf me  
und wi us em Nüt bricht er zäme im Sang  
risst sini Line-Chutte-Bängle vonang  
u sini Häng zittere

CHOR:

heyo heyo i biete mini Seeu  
für ei grossi Antwort uf ne Frag

heyo heyo Schlund vo aune Meer  
säg mer wonis finge  
säg mer woner isch

heyo Ladrina  
I sueche no mis Grab  
i bruche none Antwort uf ne Frag

heyo heyo Schlund vo aune Meer  
säg mer wonis finge  
säg mer woner isch

# FALTER

Är isch ganz - alei gebore am ne Summer - i der Nacht  
het sech befreit und sich entpuppt und sich sofort uf e Wäg gmacht

sisch so sini Bestimmig i derä Dunkuheit - z läbe  
und är isch froh drum und är isch stouz druf u geit der Nacht gärn entgäge

aber plötzlech u da entdeckt er öppis schöns öppis so verlockends  
öppis weichs - wo da so lüüchtet us der Ferni und es lockt ne

är cha nid widersta o wenn är iz weis besser i zupfes  
aber d Versuechig isch so ungloublech sine Instinkte zum Trotz

fäderliecht schwirrt är dört füre und es wird stercher oh Maria!  
e Liechtchegu schinet abe und är lüchtet genau ihn a

und är wot nur no eis - wot nume ine ine i das Liecht  
wott immer meh wott - immer necher - aus angere isch im iz glich

nume Liebi u nume Freud u nume schön merci dass mer hie si  
aaah s wird wermer, immer schöner - je nöcher dass är am Liecht isch

gimer meh ah! gimer meh! är isch so süchtig nachem Liecht  
s wird ihm aus eso egau, är gseht nid, wi sis Läbe dranne zer-bricht

und är der Räscht drum vergisst, sini Fründe, sini Familie  
är cha sech däm Liecht nüm entzieh doch das het er no nid so realisiert

wott nüt ghöre! i gseh es Tau! i gseh der ultimativ Boost!  
vilech e Tunnu vilech es Portau - i mues iz dört druf!

aber statt no meh Gfüeu, gits plötzlech e Knau  
wine unsichtbari Wang, und was foug - isch der Fau

är het gemeint är gseht iz Gott, aber iz checkt ers - u chönt gränne  
und iz hets ei Fauter meh um di Strasselatärne

nach nächtelang sinnlos die Glasschibe z küsse  
erkennt er sech plötzlech, mau i re klare Stung

chline Fauter, dis Schicksau wots IZ vo dir wüsse  
flüg hüt no wit furt, und dräi, di nieh me um!



# AFFE

I ha glehrt i cha aus si, i ha gwüsst i wot aus ha  
gmeint es isch aus da, sone dicke Haus gha  
no gar nüt gseh hie, u glich scho aus satt gha,  
dänkt i mues zersch d Wäut gseh, i mues i ne Stadt ga

i bi im ne tichte Suit id Skybar - ha über d Stadt grinst,  
ihre u mir es Zimmer gno u nid emau der Name gwüsst,  
Michelle, oder Marriot oder Holiday Inn  
i ha z gfüeu gha mir het d Stadt ghört, glücklech, u so bling

i bi zrug cho u tiefer gheit aus me Löcher cha grabe  
so viu fautsch gmacht, gottverdamm i hätt mi fasch begrabe!  
mit Ach u Krach haglets uf mis Dach abe  
zum guete Glück - das sägeni hütt isch viu der Bach abe!

i bi i Rägeward gange - es het fasch keni Affe me  
ha ir Beratigsfirma gschaffet und ha angers viu Affe gseh  
aus vou Affe he - richtig u di schaffe dert  
vou im ne Affegheg, dört hani schaffe glehrt

när hani Sprache glehrt, när hani Gartne glehrt  
ha d Ärde scho vo unger gseh, wüu i ha e Garte gchert  
had Ärde scho vo unger gseh - i bi i Süde greist  
z Läbe i voue Züg gnosse när si mini Züg entgleist

bi uf New York, dür d Strasse, ha glost wi si sech rüeme  
so much culture here in Brooklyn, diversity in Queens  
- i ha gnickt u dänkt  
mann dir sit äue no nie z Bieu gsi!

REF:

ey was machsch us dim Läbe, säg was machsch us dim Läbe?  
jung QC, dumm u a der Nacht chli erläge  
du muesch los use ufe du was steisch so dernäbe?  
lueg di a i frag di würklech ey was machsch us dim Läbe?

ey was machsch us dim Läbe, säg was machsch us dim Läbe?  
du bisch jung gsung aber a der Nacht chli erläge  
du muesch los use ufe du was steisch so dernäbe?  
lueg di a i frag di würklech ey was machsch us dim Läbe?

u so hani glehrt dass nid aus em Rued grächt wird  
aber Globalisierig und Völkerdürmischig fasziniert mi  
i 30 Jahr wärde aui Stedt vor Wäut gliich si  
nume Bärn, Bärn wird no denn usgseh wi vorgester

u so hani Erfoug gha, weni aber Goud gha  
ha chli derzue ghört u zäh Jahr nüm groucht gha  
ha mi uf mine Loorbeere usgruhit -  
nächär ufgwacht u gmerkt, shit bi chli leini hie

shit i hät no Hunger gha, shit i bi so schlaftrunke  
hätt fasch chönne unger ga - unger ga

und immer wider hani dä Auptroum gha  
u gseh mi da säuber aus aute Ma  
der Sensema chunt het es Auphorn da  
u fragt warum i no ke Antwort ha

derbi isch mi Ehrgez mau gschobe, mir e Nachricht hingerla  
druffe steit, läck mer Dumpfbacke  
gang alei i d Wäut use di ga stumpf mache,  
het wöue Stunk mache - da bini ufgwacht

lug lüt gö wäutwit ga luege u sueche nach me WIFI  
LP, hie het niemer me Entdeckergeischt,  
u s wird immer wi egal, wo u i welem Hostel  
i welem Land mir iz grad wenn u wie uf Facebook si

so hani Antworte gsuecht, uf wortwörtlech jedem Kontinänt  
ha meh Erklärige gfunge ausi Frage ha gha  
u bi irgendwann hei cho und ha gmerkt gha  
dassi ohni di Erklärige fasch am meiste glehrt ha - ungerwägs

REF

OUTRO:

verstriche di wärtvoue Stunde nüm eifach u plane mer hie no mis Schloss  
u häbe für di mini Nase i dräck und i stige ab mim huere Ross  
ha so verdammt, vili Momänte verzoge verschwändet vergüdet für immer  
für niemer hanig öppis botte mau ehrlech was fäut scho wenn ig mau verschwinde?

verschwinde für immer